

Pelabur Perlu Lihat Perlis Sebagai Antara Lokasi Pelaburan Berpotensi - Raja Muda Perlis
Bernama
3 Februari, 2013
Daripada Adnan Jahaya

MEDAN (Indonesia), 3 Feb (Bernama) -- Raja Muda Perlis, Tuanku Syed Faizuddin Putra Jamalullail mempelawa para pelabur asing yang berhasrat melabur di Malaysia turut melihat Perlis sebagai antara lokasi pelaburan yang berpotensi.

Baginda bertitah, kestabilan politik, keselamatan yang terjamin dan risiko bencana alam yang minimum adalah antara yang boleh memikat pelabur ke Perlis di samping kos hidup yang tidak tinggi dan kemudahan infrastruktur, utiliti serta jaringan teknologi maklumat dan komunikasi (ICT) yang berkembang.

Bertitah merasmikan promosi masakan Perlis di sini hari ini, baginda bertitah, Perlis juga menjadi pengeluar modal insan berkualiti tinggi dengan wujudnya Universiti Malaysia Perlis (UniMAP), Universiti Teknologi Mara (UiTM), Politeknik Tuanu Syed Sirajuddin (PTSS), Alliance University College of Medical Science (AUCMS) dan Kolej Antarabangsa Teknologi & Profesional (KATPM).

Baginda bertitah, keenakan masakan Perlis yang telah dipromosi di 17 lokasi seluruh dunia juga sudah pasti membantu memikat pelabur terutama para pelancong ke negeri paling utara di Semenanjung Malaysia.

Promosi masakan Perlis sebelum ini pernah diadakan di beberapa negara termasuk China, Australia, London, Jepun, Vietnam, New Zealand, Uzbekistan, Qatar, Thailand serta beberapa lokasi di Indonesia.

Menurut baginda, kedudukan Perlis di tengah rantau pertumbuhan segi tiga Indonesia, Malaysia dan Thailand (IMT-GT) menjadikan negeri itu begitu penting untuk kegiatan pelaburan.

Rantau IMT-GT membabitkan 22 wilayah dan negeri di ketiga negara itu membabitkan kawasan seluas 569,652 kilometer persegi dengan 67.7 juta penduduk.

Baginda bertitah di peringkat Malaysia, Perlis diletakkan di bawah Wilayah Ekonomi Koridor Utara (NCER) yang membabitkan kerjasama pihak Kerajaan dan swasta dalam memacu pertumbuhan ekonomi berfokuskan sektor pertanian, pembuatan, pelancongan dan logistik.

Turut berangkat ke pelancaran promosi itu ialah Raja Puan Muda Perlis Tuanku Hajjah Lailatul Shahreen Akashah Khalil.

Turut hadir Konsul Jeneral Malaysia di Medan, Ahmad Rozian Abd Ghani, Pengarah Tourism Malaysia di Medan, Cik Nor Asikin Haron dan Pengurus Besar Hotel Soechi International, Medan, M. Arief Ng Abdullah.

-- BERNAMA

Source: <http://www.bernama.com/bernama/v6/bm/newsindex.php?id=925719>